
2Kor 5:1-10: Hou moed! Volhard! Binnekort! (1)

No. E297

Tydens 'n ernstige siekbed, toe hy gedink het hy gaan op die jeugdige ouderdom van 35 sterf, het die Puritein, Richard Baxter, die gewoonte ontwikkel om 'n halfuur elke dag oor die hiernamaals te peins. Hy skryf dan later hoe baie hierdie praktyk oor jare heen vir hom beteken het.

- Tensy die wederkoms van Jesus Christus binnekort plaasvind, gaan een en elkeen van ons moet sterf. Daar is geen uitsondering nie. Daar gaan 'n oomblik aanbreek dat my hart die laaste van sy, sê maar, 2500 miljoen pompe gee, en dat ek my laaste asem uitblaas.

En dan? Sal ek nog bewussyn hê? Hoe lank sal dit duur voordat ek my bewussyn terugkry? Wat van die tyd tot en met die wederkoms en my opstanding? Hoeveel sal ek weet? Waar sal ek wees? Ons sou die vrae oor die lewe na die dood kon vermenigvuldig. Dit raak ons almal, nie waar nie.

Kom ons neem aan dat ons voor die wederkoms sal sterf. Daar word na ons staat tussen die liggaamlike dood enersyds en die wederkoms van Christus en my liggaamlike opstanding andersyds, verwys as die *tussentoestand*.

Paulus het geweet hoe belangrik dit vir ons is om te verstaan wat die hiernamaals inhou. In 1Ts 4 skryf hy: "Ons wil hê, broers, dat julle nie onkundig moet wees oor wat met die

ontslapenes gaan gebeur nie" (13). En dan eindig hy sy paragraaf só: "Bemoedig mekaar dan met hierdie woorde" (18).

Die regverdiges en die onregverdiges gaan hierdie tyd, na die dood en voor die opstanding, op verskillende plekke en in verskillende toestande deurbring (vgl. Lk 16:19-31). Maar ons fokus nou op diegene wat gered is.

Ons gaan dus praat oor die staat waarin ons afgestorwe broers en susters in Christus op hierdie oomblik is. Ons gaan praat oor die plek waarheen een en elkeen van ons wat waarlik gered is binnekort sal gaan, indien die Here talm om te kom.

Waar is hierdie plek? Allereers moet ons besef dis nie 'n plek binne ons dimensies van tyd en ruimte nie. Die bybel gebruik veral twee name daarvoor: die *hemel* en die *paradys*.

- *Die hemel* is 'n baie wye en ryk begrip in die Skrif en ons kan nie nou in besonderhede daarop insak nie. Al wat ek nou daarvoor wil sê, is dat die Bybel dit - soos ons nou daarvoor gaan praat - aan ons voorhou as die woonplek van God. Dis waar die klem val, en nie, byvoorbeeld, op die lokaliteit daarvan nie. *Die hemel is waar God is*.

- Die begrip "paradys" kom slegs in die Nuwe Testament voor, en dan ook net drie keer (Lk 23:43; 2Kor 12:4; Op 2:7). In eersgenoemde vers sê Jesus vir die misdadiger aan die kruis: "Ek verseker jou: Vandag sal jy saam met My in die paradys wees." Ons kan dus met stelligheid sê dat dit die plek is waarheen ontslape kinders van die Here gaan - om by Hom te wees. Dis oorspronklik 'n Persiese woord, en dui op 'n ommuurde tuin of park. Daar is dus skoonheid, vrede en orde. So

gebruik die Septuaginta ('n voor-Christelike Griekse vertaling van die Ou Testament) dit vir die tuin van Eden.

2 Korintiërs 5:1-10

In hierdie paragraaf is die apostel baie seker hy weet wat op hom wag. Oor net een ding is hy onseker - gaan hy sterf en die tussentoestand binnegaan, of gaan hy die Here se wederkoms beleef en onmiddellik en finaal verheerlik word?

Ook ons weet nie wat die antwoord op hierdie vraag is nie. Daarom het die Here Jesus Sy dissipels aangespoor om altyd gereed te wees, aangesien hulle nie vooraf weet wanneer hulle gaan sterf, of wanneer die wederkoms sal plaasvind nie.

Laat ons dus seker maak ons is elke oomblik reg om die Here te ontmoet. So skryf Johannes dan ook: "Elkeen wat hierdie verwagting in verband met Hom koester, hou homself rein soos Jesus rein is" (1Jh 3:3). En as mens die wederkoms en die hiernamaals ernstig opneem, is dit inderdaad 'n kragtige aansporing tot 'n heilige lewe.

- **2 Korintiërs 5:1**

Die "aardse tentwoning" (OAV) waarvan Paulus hier praat, is sy beeld vir die huidige liggaam. Daarmee beklemtoon hy die broosheid en tydelikheid daarvan. Hierdie beeld word ook gebruik vir die Here Jesus se vernederde liggaam in Jh 1:14. Die Woord het mens geword en onder ons kom woon; letterlik: Hy het kom tent opslaan onder ons.

Maar hierdie tent sal eendag, met die herskepping, vervang word met 'n onverganklike en permanente woning, deur God self gemaak

- 'n nuwe, verheerlikte en ewige liggaam.

• **2 Korintiërs 5:2**

Paulus vul nou sy beeld aan. Hy beskryf die liggaam nou nie net as 'n huis of tent nie, maar ook as 'n kledingstuk. Ons verlang, sê hy, dat ons uiteindelijke hemelse huis soos klere vir ons aangetrek sal word.

Die woord "oorklee" (OAV) of "oordek" (NAV), is betekenisvol. Hiermee wil die apostel sê dat ons begeer dat ons verheerlikte liggame somer dadelik oor ons ou liggame aangetrek sal word soos mens, kom ons sê, 'n trui bo-oor 'n hemp aantrek. Presies wat hy hiermee bedoel, verduidelik hy dan in v.3-4.

• **2 Korintiërs 5:3-4**

Ons wil nie graag eers uitgetrek word en vir 'n tyd lank "nakend" wees voordat ons met ons verheerlikte liggame bekleed word nie. Duidelik sinspeel Paulus hier op die liggaamlose tussentoestand na die dood en voor die opstanding. As ons dus in hierdie lewe verlangend sug, dan is dit nie in die eerste instansie 'n verlange na die "naakte" toestand nie, maar dis 'n begeerte om somer dadelik ons nuwe liggame te ontvang.

Heeltemal anders as die Griekse filosofie van destyds, dink die apostel nie dat die menslike gees op sy gelukkigste is as hy vry van 'n liggaam is nie. Inteendeel, hy ag so 'n toestand as naaktheid, as subnormaal, en as sodanig as alles behalwe ideaal.

• **2 Korintiërs 5:8**

Kom ons spring 'n paar verse. In v.8 sê Paulus

egter dat hy nogtans eerder verkies om te sterf as om in hierdie liggaam te bly leef. Waarom is die naakte staat sonder 'n liggaam in die tussentoestand - indien die Here talm om te kom - vir hom verkieslik bo die tent bestaan van hierdie lewe? *Omdat hy dan by die Here sal wees! Anders gestel: om by Christus te wees, sal meer - baie meer - as opmaak vir ons tydelike verlies aan 'n liggaam.*

In FI 1:23 sê die apostel dat hy verlang om heen te gaan en "met Christus" te wees. In vergelyking met hierdie lewe is dit "verreweg die beste".

Saamgevat

Wat Paulus meer as enigiets anders verlang, is om steeds te lewe wanneer die Here Jesus Christus terugkom - en om dan onmiddellik sy verheerlikte liggaam te ontvang. Maar selfs al moet hy voor die tyd sterf, is die onnatuurlike en minder as ideale liggaamlose tussentoestand steeds baie beter as hierdie lewe - *want selfs in die tussentoestand is ons reeds by die Here!*

Gelowiges gaan dadelik na hulle dood na Christus toe.

Kom ons som op. As ek sou sterf voordat Christus terugkom, bly my dooie liggaam agter en verval tot stof. My gees gaan dadelik na die Here toe (Pred 12:7). Van my eerste lewensoomblik af is ek immers nie net 'n fisieke liggaam nie, maar ten diepste is ek ook gees - die nie-materiële deel van my persoon.

Die Skrif gee ons alle rede om te glo dat ek onmiddellik na my dood by die Here sal wees. Die Here Jesus sê byvoorbeeld vir die

misdadiger aan die kruis: "Ek verseker jou: *Vandag sal jy saam met My in die paradys wees*" (Lk 23:43; vgl. ook FI 1:23).

Ons lewende hoop

Een van die kosbaarste gawes wat die Here vir ons in hierdie lewe gee, is 'n lewende hoop. Vir die ongelowiges, veral vir die bejaardes, moet elke doodsberig seker klink soos die geknars van die beul se sleutel in 'n ter dood veroordeelde se seldeur. Male sonder tal dank ek die Here dat Hy vir my nie net lewenssin gegee het nie, maar ook sterwenssin. Maar vir die gelowige is dit só anders! Wat sou ek sonder 'n ewigheidsperspektief en -verwachting gedoen het? Daarsonder kan 'n denkende mens tot geen ander slotsom as Albert Camus kom nie: "Die lewe is 'n siek grap!" En inderdaad is 'n ongelowige wêreld tot die dood toe krank aan sinloosheid.

Daarenteen, as die dinge waarna ons kyk, op die tafels van jou hart geskryf is, sal jy saam met die pionier-sendeling in Burma, Adoniram Judson, kan sê: "Wanneer Christus my roep, sal ek gaan met die uitbundige blydschap van 'n skoolseun wat vir die somervakansie deur die skoolhek hardloop."

Nico van der Walt

- Nico v/d Walt onderskryf die historiese, internasionale en reformatoriese 1689 Baptistebelydenis, asook die Belydenis van Sola 5, 'n assosiasie van Godgesentreerde ewangeliese gelowiges in meer as 'n halfdosyn lande in Afrika suid van die ewenaar.
- Subskripsies, adresveranderings, kansellasies en korrespondensie: Postnet Suite No.148, Privaatsak X1, Northcliff, 2115, Suid-Afrika. E: nico.vanderwalt@reform.ed.org.za; Tel. 011 476 2907; 082 848 9396.
- Blogs: www.e-preke.blogspot.com (met skakels na nóg 4 blogs)
- Gereeld word 'n preek/studiestuk soos hierdie wêreldwyd en gratis in Afrikaans en Engels per e-pos gestuur aan mense wat dit persoonlik aangevra het.
- Geen kopiereg. Dupliseer of preek gerus. Of stuur verder.